

ओ जी ओ बाबाजी,
थारे मंदिरिये में आस्या,
कोई फागण कै मेळै मं,
रंग जमास्यां जी,
जै जै म्हारा खाटू वाळा श्याम धणी ॥

केसरिया पचरंगी ध्वजा हाथां लेकर आवां,
कोई गोटे की किनारी चिपास्यां जी,
जै जै म्हारा खाटू वाळा श्याम धणी ॥

होली की धमाल ढोळक ढपली उपर गांवा,
कोई छम छमिया पै नाच नचास्यां जी,
जै जै म्हारा खाटू वाळा श्याम धणी ॥

सेवगिया ल्यावैगा भर-भर रंग पिचकारी,
म्हारै खाटू वाळै श्याम नै नुहास्यां जी,
जै जै म्हारा खाटू वाळा श्याम धणी ॥

भर-भर धोबा रंग गुलाल उडास्यां,
कोई मन्दरिया मं धूम मचास्यां जी,
जै जै म्हारा खाटू वाळा श्याम धणी ॥

थारै बिन्या सेवग प्यारा मनड़ो कोन्या लागै,
कोई फागण कै मेळै मं मेल मिलास्यां जी,
जै जै म्हारा खाटू वाळा श्याम धणी ॥

मायत म्हारा थे हो बाबा टाबर हां म्हे थारा,
कोई आपसरी की प्रीत निभास्यां जी,
जै जै म्हारा खाटू वाळा श्याम धणी ॥

मतवाळै भगतां नै देख बोलै म्हारो बाबो,
कोई सालीणां मेळै मं थानै बुलास्यां जी,
जै जै म्हारा खाटू वाळा श्याम धणी ॥

सुण करकै फरमान असो गद् गद् होग्यो सेवगियो,
कोई बाबै कै चरणां मं धोक लगास्यां जी,
जै जै म्हारा खाटू वाळा श्याम धणी ॥

मित्र मण्डळ का बाळक बाबा द्वारै थारै आया,
थारै मन्दरियै मं ध्वजा फैरास्यां जी
जै जै म्हारा खाटू वाळा श्याम धणी ॥

ओ जी ओ बाबाजी,
थारे मंदिरिये में आस्या,
कोई फागण कै मेळै मं,
रंग जमास्यां जी,
जै जै म्हारा खाटू वाळा श्याम धणी ॥

Upload By Vivek Agrawal

Source: <https://www.bharattemples.com/o-ji-o-babaji-thare-mandiriye-me-aasya/>



Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZjyhhKzSUD-Lt9Tw>